

摘藻堂四庫全書薈要

集部

欽定四庫全書薈要卷一萬六千二百十九

集部

秋澗集卷六十三

元 王惲 撰

祭文

告家廟文

維至元四年歲次丁卯六月丁巳朔廿三日己卯孝
曾孫王惲等謹以香酒時果牲帛庶饁之奠敢昭告
于曾祖考府君曾祖妣夫人臨清呂氏顯祖考修武
府君先祖妣夫人孟氏韓氏皇顯考忠顯府君皇顯

妣夫人靳氏之靈先以丙寅之歲十有二日為子公
孺聘婦得宣慰石君之第三女茲者往之女家躬展
禮幣令龜告吉日維斯時廟授有儀式伸虔告尚
饗

祭元神祝文

歲次丙辰九月戊戌廿九日丙辰臣某等謹以清酌庶
羞之奠敢告于歲德之君惟神一歲之君百臣是統端
臨異位獨秉威權悔吝灾祥維神是與臣某父某年踰

知命心切齊家動靜之間既乖攝養公私之際尤重愆
違而又庭戶積殃子孫不孝於七月廿七日遽嬰末疾
將抵時冬困致沈綿力疲舉履日因元命躬薦愚衷幸
冀神明蚤躋和豫尚饗

告家廟文

維至元四年八月丙辰十七日壬申孝子惲忱等謹以
清酌百羞之奠敢昭告于皇顯考忠顯府君顯妣縣君
靳氏之靈嗚呼哀哉維丁巳歲八月至今年丁卯秋仲

府君捐館十週星矣實至元四年秋八月丙辰朔十有八日癸酉也十者數之盈天道之小變也祭法以春秋享奠蓋因其氣之終始而致思焉矧履霜露瞻拱木歲月近紀親日愈遠得不極其志而重其傷感乎今之所謂道供豈古致齋饗親之意與茲者爰即正寢敬演靈章庶伏真筮以證妙果神維格思式伸虔告尚饗

至聖文宣王奉安祝文

於赫元聖萬世作準曰仁曰義風化之本顧瞻清廟曠

茲有年咎將孰執迺吏之愆爰自下車心弗遑安靡朝
匪夕載經載營誕彌八月厥功告成奕奕新廟桓桓玉
楹峻以文階重以神幄有翼有嚴乃丹乃雘爰居爰處
以清以寧神格其思享茲菲誠爰暨厥民日焉啓迪仰
止瞻依聿修厥德庶幾報本以謝不職尚饗

宛國公奉安文

伏以庶工告成新廟孔碩於穆素王之亞聿陪元聖之
居仰底攸寧永欽厥祀尚饗

鄒國公奉安文

伏以有嚴闕宮載新祀典乃增光於肖像永配享於神
庭於穆維清尚安且妥尚饗

辭墓祭文

維大元國至元九年歲次壬申四月乙未朔十七日辛
亥男孫惲謹以清酌之奠敢昭告於曾祖王父顯考王
府君之靈惲自至元五年冬十月被召赴臺九年春用
前資翰林修撰由監察御史改授承直郎平陽路總管

府判官已擇此月十九日赴任所今當遠離墓次伏冀
明靈特垂陰祐尚饗

祭孚惠神祠文

六月十四日祈雨至十八日申刻大雨至十九日黎明方止

惟神淵懿徽柔德妃乾方濬沸其泉實為淵浸屋而祀
之禮固宜矣茲者時雨愆常蒲絳兩州旱暵頗甚吏實
不職民將何尤夏麥勤而半成槁稼噓而可燎衆仰一
溝之水待為卒歲之安然得之有限溉之不濟與其施
及乎有數之田何若膏潤夫一境之內惠卹哀憫繫神

能然伏望起伏龍鞭電轂神泓為之變動川雲隨而翕
從細接天瓢溥霑畝使槁者勃興而如握熱者得濯
而輒醒雲漢昭回一滌蘊隆之氣甌窶滿載卒成大有
之年神能鑒茲敢忘昭報尚饗

祭斛律丞相文

大元國至元九年歲次壬申六月丁亥朔初八日甲午
承直郎平陽路總管府判官汲郡王惲謹以清酌庶羞
之奠致祭于有齊忠臣大丞相咸陽王斛律公之神伏

念惲以監察御史叨承郡幕視事之初來讞茲獄求情
罔獲非神疇依惟神心秉塞淵氣餘忠謹始焉遇合於
神武終以威馳於栢壁生為良弼歿為明神對越英靈
凜然如在以德以功宜永嚴祀惲授館絳園迫近神廡
號呶扑擊不無震驚然克悍禍賊實神所懲尚矜不逮
俾集厥事式伸明薦以克來饗

康澤王廟謝雨文

惲訊獄絳陽回經太平百里之間秋禾如槁物之生植

時方尚養民之告病不能不動俾驕陽亢甚耕隴塵翻
誠守吏不職之所致也近雖致禱於鼓塢行復展誠於
祠下及次襄陵油雲四興甘澤霈於郊野灑然溥獲沾
足且龍化無方龍德為大山澤一氣初無間然雖愚衷
適與之會實神顧卹而惠之也用薦明禋以答靈貺尚
饗

拜奠夷齊墓文

維大元至元九祀歲次玄默涖灘冬十二月既望承直

郎平陽路總管府判官王某恭以牢醴之奠致祭於孤
竹二賢之墓嗚呼天下有當然難舍之事惟特立者能
成之天下有至中大正之道惟齊聖者能明之三代而
下建天地之極定君臣之義揭若日月亘萬古而不滅
者其惟二賢而已壬申之冬某以守吏按事蒲坂仰止
高山其立卓爾所謂聞凜凜之風者頑夫廉懦夫有立
志也趨拜几像山烟四起奠以牲醪若恐將浼有薇在
山有粒在簋潔以馨誠薦我明水尚饗

祭黃厓山神文

節彼南山奠安一方爰產竒石紫質青章王宮繕興爾
馬來營伐而材之不無震驚用是昭告惟神降寧庶憑
默佑迄用有成尚饗

謁西岳廟文

維神德媿坤維氣涵崑潤際四海洪荒之內位實雄尊
在提封密邇之間理當趨謁仰止三峯之峻來伸一禱
之誠僥倖之求所不敢萌憂戀之心庶幾昭鑒爰生申

甫來佐明時冒瀆顯靈豈勝悚惕尚饗

安二賢神文

某以壬申之冬來拜祠墓悼其傾圮几像暴露載經載
營今也告成睠彼雷首肅焉神庭繫二賢之德聖之清
兮以孔聖之哲極所稱兮揭若日月何廟貌之尚兮封
而匪屋來者何瞻仰兮蒼煙喬木何山爛其光兮盤非
周粒桂酒苾其香兮神其格思歲永此而康兮

肇祭霍岳文

大元國至元十三年歲次癸酉六月壬午朔二十有六
日丁未承直郎平陽路總管府判官王某謹以牢醴之
奠致祭於霍岳中鎮應靈王之神維神峻秀靈異鬱為
鎮山冀州之野嶽麓所盤致興雲雨祀典載新報本信
敬茲焉其辰顧維守吏歲奉嚴禋邊豆孔修敢告駿奔
乃祝之曰高宜麻麥兮下宜稌蛟蛇結盤兮物不竄王
事庶集兮神所與

康澤王廟祈雪文

大元國至元十年十二月己酉朔承直郎平陽路總管
府判官王惲謹以清酌之奠敢致禱於康澤王之神伏
念一冬三白歲事之常今者云暮未覩其祥寒律徒切
風埃瀕洞宿麥雖萎猶含餘凍載憂載忡春疫為重彤
雲油油既合而收和氣致盭政或未修吏實不職民將
何尤惟神降鑒一雪孔周灾沴不作惠我來牟吾儕小
人敢後神休尚饗

祭靖應真人姜公文

大元國至元十一年歲在甲戌二月戊申朔十有二日
己未承直郎平陽路總管府判官王某謹以茗果之奠
致祭於靖應真人姜公之靈某以中統元載列職省郎
得掌綸命帝遣使臣奉宣詔旨起公於晉有遐想仙標
載勤駟乘之語眷眷之意何其隆信者哉逮明年獲拜
下風寶玄之宮野服黃冠道溥德冲曾無一言及乎本
宗其揄揚稱頌若恐隕越者堯舜禹湯文武之道之功
建祠奉祀竭夫一躬退而論思豈墨名而行與儒同者

耶及官平陽載觀儀容振袂談舊一沛平生之宵愈知
靖專之性精誠之德足以動三河而沃淵泉也云何一
別上仙三峯杳黃鵠其何邁將神游乎太空天藐雲高
涕泗無從過故都而眷戀庶斯文之可通尚饗

兵次孟津祭靈源王文

維十有一年甲戌夏五月丙子朔越七日壬午承直郎
平陽路總管府判官王某敢昭告於靈源王殿下我國
家將有事於南服桓桓兵甲例作於晉顧予小子實總

其一焉今茲南邁前次河壩尚克顯相其安以濟豈惟
可免薄責誠以威靈陰隲以先啓行之力也尚饗

祭平陽府東城門文

維神職司啓閉氣積陰凝今者淫霖為祟已及浹旬害
彼染盛動妨民作伏望導迪陽和遠成開霽尚饗

祭皋陶文

惓以到官四日奉憲部符鞫絳陽獄大小之情心敢不
盡恍惚曖昧有不可致詰者使讞議適當生死兩明愚

表不逮神惟能誘之寃滯沈痛捶楚之下求而不獲者
神惟其伸之伏惟明靈尚克顯相

中元節祭三代告生孫汾郎文

伏為男公孺新婦石氏於今月十有二日辛巳生子名
曰汾郎益人倫之事繼續為大因時以饗式伸虔告庶
憑神佑其安且宜尚饗

立社稷祭告文

維神五土之祇百穀之本血食於社萬世依準禮墜而

興張本自茲牲醪香脂鼓鐘清夷迄用康年神其妥而
維神百穀是長萬民之天配食於社古莫能遷名存實
亡乃吏之愆張本於茲神其鑒焉有酒斯旨有牲肥鮮
維神格思歲其有年

范陽房族祖九翁祭文

維至元十三年歲次丙子冬十月壬戌朔十有八日己
卯房孫謹以清酌少牢之奠百拜致祭於故軍資府君
族祖九翁之靈嗚呼哀哉十二年春予守官平陽祖母

慕容氏書來以公訃告國有常制莫敢擅離然聞母弟
忱自疾亟於引柩納壙皆與及喪次雖不獲載星奔赴
中為少遑也越翼日即縞素為位於府北郊之僧舍發
哀以祭婦推氏子公孺新婦石氏在焉感不視事者五
日迨今年春三月秩滿東還將為指日即路得哭墓而
唁親老也復為中書檄去考試河南四道滿三月而歸
日月逾邁霜露之感積諸中而至于悠久也如是曠慢
不恭之責將何所逭今茲之來駿奔露處不遑安者凡

十有四日含凄茹辛實以祭告為事伏惟神靈鑒茲哀
悃嗚呼哀哉尚饗

祭中書左丞姚公文

聖維天開寵綏九有必誕賢輔以左以右手幹機衡殆
天旋斗伊公挺生奮迹營柳長白之英遼江之瀏元氣
網緼鍾此靈秀脫落俗學沈浸道園姬情孔思伊淵洛
藪一物致知千古尚友起而翼漢雲雷交邁啓沃淵衷
達聰纘黈至元之初公綰機紐謀謨廟堂股肱元首職

分六卿網維結糾帝載用熙豐而不部大明黜陟罷候
置守萬鈞機張賴公寬穀霖雨一濡載清宇宙我武維
揚荆襄持久大闢屯田櫛比糧糗公善開物務深耕耨
豳風良耜十千為耦繼倡農司萬邦是揉明彼王道始
夫南畝護軍來歸雪髯垂脰長江失險萬介北趨特置
館筵禮貌耆耆眷我儒臣甘盤之舊天理人私自公判
剖國勢民機倚公安否有辯懸河而惡利口四海具瞻
漢更商叟龍光稠疊玉壘秬卣望公百年以佐元后胡

不慙遺梁木壞朽彼蒼悠悠莫之能究嗚呼公之為學
知所先後味道飫經太羹玄酒平生游藝組綉雕鏤公
視餘事為世瓊玖公之逢辰道合非偶來儀舜廷台鼎
鳳雛揚歷中外足展抱負八十之春已極眉壽考終牖
下載啓其手有子承家公復何疲嗟吾道之如綫念後
學之孤陋與斯民之不幸孰思濟而云救憚自束髮辱
知最厚拔濯提撕兩端親叩至登瀛洲再承善誘弦晦
一週玉堂清晝今公云亡此會難又情悄悄以填膺淚

浪浪而霑袖今也送不遑執紼葬不得撫柩寓哀斯文
為一觴侑尚饗

故尚書禮部郎中致仕丁公祭文

嗚呼維至元十三年夏六月暉考試河南拜公床下留
語終日言不及私維是治之隆汙民之殿屎法具未完
涕下連而至於廉於律已老而知止教子以義方勅斷
家事其在倫列如公一人而已此天下之公論非予得
而私議也區區之誠幸惟鑒茲尚饗

故吏部尚書高公祭文

至元十五年閏十一月十一日大雪中拜奠

維中統壬戌之春憚以事累退耕於壠畝者再罹寒暑
既而擇御史開憲府人文之選公以予主不肖誤蒙公
知擢置言路三年裏行我盼我顧豈惟使之增先迄薄
用於今者實公之載舉及官平陽公判吏部不以契闊
憐我椎魯每借譽於時人為聲勢之一助是又見公終
惠且勤不我遐遺之故也至於雄文大冊忠規治具三
峽秋濤危波砥柱茲公論之有在匪鄙言之能喻念公

平生霽霽德度霽賸馥於蘭臺悵歲律之已暮敢以受
知丁巳之私抒予哀而告公之墓也神惟有靈鑒茲誠素
尚饗

外祖安陽縣丞靳公祭文

十五年後十
一月十五日

憚年垂髫省識公面蒼髯堂堂山立而異逮予成童受
訓母氏公之世家頗聞一二或官鄉縣或擅科場歷年
五百財雄一方至公而衰亦理之常厥後一紀公歿二
鄉惟嗣罔續我為燕傷春秋時思合食祖傍是用傳訓

子孫奉行公殯淺土幾三十春棺衾改卜未就深藏姨母
雖在顧力弗遑有劣其甥按部洹漳東望堯城心焉靡
寧迎置姨母如拜儀形爰念葬事與之經營及茲春首
寔公於塋庶幾畢考妣之志慰安公之神靈也尚期不
昧俯鑒微忱尚饗

左丞董公祭文

至元十六年歲次己卯九月乙巳朔越有三日丁巳朝
列大夫燕南郡河北道提刑按察副使汲郡王惲謹以

清酌嘉肴之奠致祭於故資德大夫中書左丞簽書樞
密院事贈紫金光祿大夫平章政事謚忠獻董公之靈
觀夫大燕南陞全趙北垠神尖鬱茂滹池滄淪蟠精萃
秀篤生異人公應運挺出絕類離倫說敦詩禮感會風
雲奮父祖之餘烈策寇鄧之高勛其志慮良實又濟以
武惠惻隱之仁謙而接物勇見於大敵恭以持已孰知
夫世臣至於肅齊家範友于弟昆忠結主知德庇生民
功愈大而心轉小寵既厚而憂益殷無私蓄為子孫之

計不樹黨收門牆之恩其公亮謹厚又似夫董侍中與萬石君也幾世幾年孕此忠純方沐恩於鳳詔俄星隕於中軍痛丹青之宛轉追畫像於麒麟此非一己之私議在中外哀悼所不忍聞也憚爰自布衣仰公清塵接樽酒於中統之首與賓筵於至元之春每燕語之衍衍顧若楊顥之可賓矧二弟之款曲辱交久而情深雖草宿而罔哭聊寓哀於斯文伸孺子之薄奠庶斂繫於徐公之墳也尚饗

遷奉曾外祖殿試靳公祭文并外妣李氏

維公才德兼備元精孕和早擅場屋三中巍科人文之
譽在公實多正大初元公卒宜津權厝新壠幾七十春
殞而未葬譬彼行人歸不及家曷寧其身茲者日吉時
良奉安祖傍祔以元配永閉深巖魂而有靈以賁幽光
尚饗

遷奉安縣丞外祖并外媪王氏祭文

憚以前歲後十一月廿三日為遷奉之事已告尊靈今


者應期舉厝永慰幽竢以順從祖以安其藏祔我外妣
闕此玄堂靳雖哀宗在公未傷有甥妹以主祀重時思
而不忘是則不必其子而光揚也有牲斯烹有酒斯香
神惟昭鑒歆此一觴尚饗

及葬公伯兄孝
思貢士及姆氏

秋澗集卷六十三

謹按卷六十一第十七頁後一行薩奇蘇舊作撒吉思今
改





總校官進士臣胡榮

校對官學正臣卜維吉

謄錄監生臣劉本立

欽定四庫全書薈要

集部

秋澗集卷六十四至六



詳校官助教臣謝登雋

欽定四庫全書薈要卷一萬六千二百二十

集部

秋澗集卷六十四

元 王惲 撰

祭文

祭蒲大夫文

元國至元十八年歲次辛巳三月丁酉朔十有九日

乙卯朝列大夫燕南河北道提刑按察副使謹遣從事
賈汝霖以清酌庶羞之奠致祭于河內公之靈惟公德
挺羣哲獄清片辭列高弟于聖門揚仁風於蒲邑三善

之美庸能既耶適星垣有分按之行過神宇致一杯之奠庶祈靈貺以益不能尚享

祭孝感聖姑文

惟神肇迹博靈遇仙溥浦德懿昭靈作蠶聖母於祀永賴神功斯溥食弗再則饑衣弗製則寔念此歲事惟神其惠顧之尚享

故江漢大都督河間路總管兼府尹史公祭

文

幽雪萃氣招搖耀芒合是二者篤生忠良惟公應運挺
出起家朔方奮父兄之餘烈荷天衢而鷹揚武濟文經
為時棟梁宿一軍於陽夏號東南之精強枳棘非所移
旌鎮襄撫我瘡痍靖我邊疆其惠春雨其威秋霜掇我
殘棄變而金湯復我陂障積而陵岡孰慮鱗介易我衣
裳彼氣日索我師堂堂果上鈞之一載掃敗葉於秋商
每出奇而制勝初不知古人之所長殆羊傳之久駐控
上流於荆襄雖飛渡之無及吳之所以亡者本由此而

用張能回百戰之餘勇効政績之章章鬱公堂之佳樹
至今三鎮指為公之甘棠然干將而補履終所用而失
常如憂深而思遠此夙夜之所以皇皇也竟風悲於大
樹奄龍劍於幽藏嗚呼才有餘而用不悉位雖高而志
靡償曾桃李不言而天下為之傷也公常幕余二年偶
祥促膝言笑執手飲觴略吏事而不肅謂國士之或當
茲奉恩綸按部潯陽望龍驤之塋域能我涕之弗滂寫
平生於此辭庸表公之衷腸噫慟臨江之哭在公則萬

事已矣有子孝繼以後則其流未央神之聽之庶少慰其所望也尚享

祭郝奉使墓文

大元國至元十七年歲在庚辰二月十有二日甲申朝列大夫燕南河北道提刑按察使友生王惲謹以清酌之奠致祭于故翰林學士國信太史陵川郝公之墓嗚呼甲寅之冬仲月之尾公自杞來道出鄘邶始覲清揚重於夙契把酒論交笑談游藝顧睽回翔吾子可誨臨

別之時一何勉慰維中元春雲龍交際我時游梁與公
再會東館相過四并同醉所學所行盡發其秘北次龍
崗嘔血而癘書來及予愈見友義我車北轅公也南逝
自茲及薨凡十六歲追憶平生潛焉出涕公之問學閱
肆汪濊公之文章豹炳虎蔚萬斛淵泉出不擇地太史
與倫皇墳可媿浩浩江漢萬古不廢發為忠貞見諸行
事著書垂聲諒非本意匪予得私乃世公議今我想公
令人短氣斯文綫如忍復殄瘁直筆疇歸大冊孰畀偉

績鴻休光潛揚厲而最傷公為國出使初館儀真主成
和計奉持國書以死自誓方介外侮羣獮內獮節落瘴
烟精誠益勵屬國平原同歸一致長星墜芒使輶還轡
玉上青蠅何啻一二惟皇聖明見萬里外錄勞棄瑕予
豈汝罪士無賢否入朝見忌膚懇再行與病交劇一債
不起萬事瓦弁感時懷人憂來拊髀昔賢有言當論我
輩大槩無差節目或滯如公之才如公之志雲夢九吞
曾弗芥蒂俯掇勲名高視一世意廣思長反為物制豈

惟公傷因以自識茫茫大鈞形流萬彙幾世幾年生此
偉器費用德宗誼逢漢帝百未一施胡奪之易雞水淪
光郎山歛翠隱然一丘保之西遂車過腹痛我懷曷既
黃鳥聲悲助我歔歔臨風拜公哭而載酌嗚呼哀哉孤
忠伊鬱幽憂憔悴生罔能伸死而永闕寓哀斯文庶昭
枉昧公如有靈恐予言為知己也尚享

祭武強南龍池神文

維神威洞淵府奮飛天衢致雨興雲執帝之樞顧此冀

野時極焦枯桑半捲而蟲作祟穀出墮而氣未蘇農官
至無可以勸窮民將失所需匪惟吏責恐亦神之所當
虞也况蒼精昏見適時之雩望靈池而致禱庶少全其
區區嗚呼上帝命汝以下衛民居也我當供厥職耳免
吏責而歲有成兢惕之念其敢後諸

北嶽祈雪文

冀之為分方數千里惟嶽峻極于天神奠安之水旱疾
癘神主宰之今者地不藏陽寒氣失序歲律向終未霑

冬澤俾野土不膏宿麥無望春疫將興已足深慮饑饉
薦至民何以生祈穀請命憂人之憂是亦部刺史之責
也縷縷微誠敢用昭告尚享

祭侍講學士竇公文

惟公性極肫誠道深養浩幼學壯行出人意表於周吉
士在漢有道以術濟人方德則小丁巳春識公於沙麓
之墟辛巳夏吊公於肥縣之保憶忝列於瀛洲閱歲華
者再杪世知公漢家之羽翼我以為中朝之元老謀方

膺於理咨憂遽遺於丘禱今也云亡士林悴槁据愁遺
而論斯民有無祿之歎以順受而言得五福終命之考
再拜墳阿奠酌草草顧藥籠之纖微蓋以荅平日之不
我少也尚享

丞相史公明忌日祭文

十六年十二月十九日按部中山府

維公出入將相存歿哀榮公自去世于今幾齡定人思
公雖歿猶生永言不忘曰忠曰貞見之範圍履也大成
勛藏盟府德為世程赫赫堂堂如山不傾定人那知功

被齊民憚向侍燕几
磬咳親承今遇明忌
來拜神庭感念在昔
依依我情有樂陳列
有醑在罍碧草映階
酌茲

一觥尚享

定人像公於西北隅
皆享祀謂忠孝公

史公祭文

惟公德冠羣后望隆漢儀一節四朝知無不為收武定
文綏之畧有金聲玉振之規發至仁於易簣識大運之
盈虧何已私之曾及顓戒殺而為嬉雖羊祜知吳亡而
勸進房喬以征遼而未宜固足與之等夷也嗚呼柱石

巍巍歎然中微風雨震凌幘幘者誰俾為善者嗒然而
若喪變怪者百出而不疑此又世之歔歔而含愴也公
殿是邦尤極恩威我豐碑於國門宜鎮人之涕洟切嘗
荷左提右携豈孺子之可教在卯而翼之之恩大有濟
於艱危及聞公薨身繫情馳曠一奠而如負蓋五年于
茲也今我何幸改畀燕陞歷河山之故封悵音容之依
稀念公平生其能已而公雖亡兮為世著龜公葬在天
尚克念之蓋生而矜其愚曾有以省錄豈歿而知其來

復漫無所維持也追盛德而曷報庶不辱我公之所知
尚饗

岱岳祠禱雨文

品品岱宗雷雨宅兮艮震對代生物仁兮片雲膚合天
下澤兮茲者春霜例災桑柘空兮二麥含實勒將稿兮
秋雖下種不出土兮無褐無糗歲何卒兮衣被饜飮膚
合力兮仰惟岳其念茲兮憂民之憂而亦部刺史公之
責兮縷縷微誠神其鑒兮尚享

黃石公祠乞靈文

惟公鍾秀崇丘降神圮上靈氣驚世倘况莫詰如子房
以韓亡之餘開炎漢之業為帝師之崇其顯授陰翼竟
濟世美者先生之神之功也不肖猥叨時名爰服官事
餘廿年每以昧於事機動成乖戾為愧然非其材而樂
之者有賢父兄故也矧先生之明靈乎至若矜其愚昧
濯其固陋增益其所不能非先生其誰用是乞靈祠下
區區之懷神其鑒茲尚享

修治新阡告成文

餽口四方幾二十載歲時拜掃禮有不逮水泛雷轟未
免惶駭於其事亡不孝之大謹即此月躬為修治芟蕪剪
棘增高夷圯補植林空再釐風水郭以周垣隆阿四起
樹門神游題阡表氏揭虔安靈非直觀美功今有儻以
告以祀神之聽之以克永世尚享

韓君大祥祭文

嗚呼王宗韓氏通家往來三十年間情好孔懷矧惟亡

友吾門上第貞幹風生發強剛毅其在諸生先子所器
年近而立歎歷中外臺掾郎曹名聲噦噦前歲之秋告
別何遽曾未越境夢隨川逝日月云邁奄復祥祭論其
受年校夫稟氣老而益強期頤可致衆維輿傷去之太
蚤古云五十不為之夭宛彼二雛卓有所樹翱翔仕途
儘持門戶依依孝思以永終譽君如有靈亦足以慰夫
懷之素也尚享

為姓氏告亡妻文

維丁亥歲六月十八日丁丑夫惲謹以茶果之奠告于夫人之靈推之為姓世不多有故嘗詢其所從出為汝討論者有年一無所見適讀潛夫氏姓論曰推氏建氏南氏舒堅氏魯陽氏黑肱氏皆出楚之芊姓者先君熊繹氏之胤其來光且遠矣嗚呼夫人歿而有靈亦將歆慰其光且遠者用是不敢不告尚享

中丞王公祭文

大元國至元二十六年歲在己丑二月辛亥朔越八日

戊午友生王惲謹以清酌之奠昭告于正議大夫中丞
王兄之靈嗚呼朋友之重義列天倫切切惻惻疇非弟
昆惟君顧我而我宗君以志則一以分則親如漆斯固
如蘭斯馨而敬而愛久而益新爰自垂齡以及於冠授
業蘇門各伸志願智愚雖殊道則一貫君裏淵塞浩無
涯岸脫畧辭華好謀能斷嘗論士心酬酢萬變如匪中
立鮮不棼亂此予少君餘何足筭我時念君大器已見
敦我鄙薄激我愚懦治任將歸而予獨眷繼分使符有

最無殿在昔相度有若昌黎辟佐我幕大為已知及論

國計莫之與規裴非少韓有崖其間隱忍就事材為實

難穆穆忠武曰伊曰呂桃李盈門多士如雨同升諸公

曰僕是與初疑中舍謂輕所處長屋六曹是為之所自

後騰揚又知所主曰史曰張曰姚曰許交口薦揄螭蟠

鳳翥望君廟堂致君堯禹其經綸國業固足以見君之

器宇彼或無知奚我齟齬淮海歸來道在心小角巾私

第日事墳討周防有餘虵虺結繳讒火燒城甚於原燎

伊鬱積中不無熱惱嘗切諗予憂世心悄覲閔何多受
侮不少每見慰寬外物一掃擴量冲融致養強矯死非
所憚此何足擾如金在鎔百鍊不撓白首窮塗亦足枯
槁留使咨謀為世儀表此天下之公論非一已之私禱
云何不淑不慙遺此一老吾乃知蒼蒼報施於焉有未
曉者念君問學天人理皦臨終永訣投我腹藁語何琅
琅秋空日呆淚洒行間茂陵遺草哀哀二子越玉陳寶
賢而有文適追來孝所存者長況不為天鍾鼎一事古

人誰了嗚呼事至蓋棺夫復何道尚精爽不昧而來者
是保我奠兩楹腹痛如攪言念平生相期遠到苦樂行
違知者惟鮑悠悠常情異心同貌老夫知音自深痛悼
我過孰寡我履孰蹈有慟無聞徒辟而標淚下河傾寄
茲一抱嗚呼哀哉尚享

路祭中丞王兄永訣文

維君丰度凝遠內明而外閎以予交游之久頗髣髴其
一二其所以斯疾而至於斯者而皆命之所致耶豈用

有餘而嗇於行耶物或犯而隱不校耶欲求合而反得
乖耶剪所愛而戕老懷耶不然何氣運衰謝叢一躬而
留耶方謗之興予適在燕嘗表裏乎西溪致一言於諸
公之間力雖微而莫辯庶幾友義盡予心之拳拳用是
生有以書慰之歿有以文誄之又罔以不敏復銘而賁
之辭固斐然思罄宜無愧而已今者執紼徒送永隔泉
路然古人神交罔間存歿臨歧贈言故不憚其再瀆伏
惟明靈鑒茲微悃尚享

御史中丞王公誄文

大元至元廿五年歲在戊子秋八月十有一日前禮部尚書御史中丞東魯王公薨於維陽之客舍友生王惲謹遣子某致奠以不腆之文誄焉其辭曰顯允王公天姿粹精文辭翰墨外彪中弼年甫弱冠四擅華聲從元問學館中作甥二公提撕大潰于成繼以賓師主善共城始拜公面歡如平生忘年定交實為畏允青燈孔序絳帷趙廳尊酒文會桐陰滿庭既謁寥休偉其豪英力

薦于上與之同升帝曰汝冕秉心和平乃眷乃顧語扈
南征潛鱗縱壑天衢荷亨一命卿貳尋擢厯亭改漕京
兆以廉見稱擢之提憲以顯以榮奉帷杖節激濁揚清
移鎮三晉八州救寧載臨恒衛兩河肅澄霜空千里一
鶚獨橫走叅戎車我冠振纓言議甚行王事每兢其臭
斯蘭其堅斯金兩秩五年愈親愈誠江賊俱息王度載
貞整戎六曹春官首徵再執行憲居中作丞守以大體
與時浮沉西湖歛碧吳岫空青公餘吟醉若慰羈情用

是北歸伊誰云憎徜徉淮海子潛疾嬰俟其少間偕之
北行豈其奄忽痛乖延陵剛弗愛克遂傷厥生疇昔之
夢飲予兕觥予欲從之扞格莫能今悟死別神交匪冥
今歲夏伸手書是承寄是新作託之稱停豈意期月邁
此凶屯初接傳聞既疑且詢繼來訃告大為震驚於戲
已矣王兄歿而有靈鄙懷我聽以公壽言六十六秩未
嘗疾痛體胖心逸以公宦業通貴之極三十年間略無
空隙以公文章不事雕飾平易溫雅簡而有式以公聞

望揚休山立聲價一時荆金趙璧以公盾嗣怡怡蟄蟄

翠竹高梧鸞亭鵠植所為福全百福無逆是用慰公能

事可畢方之吾儕又有大弗克及者秉彛豐厚度量寬

宏愷悌樂易碩大光明不以達貴我崇彼輕不以已長

格物自矜心無城府口絕否臧孰為機張以虞以防坦

為蕩蕩內敬外方汪汪黃波撓之不渾崑崑高山仰之

彌尊天下之人不問識否聞君之名僉曰良友是喜是

愛稱不容口我觀氣運有通有窒或負而乘君子宜息

遺逸阨窮固是推抑遽思飄蕩忽還穹碧是用輿傷載
悲載泣維此善人天地之紀幾世幾年生此偉器一朝
云亡歎興殄瘁茫茫九原愛莫之起悠悠此懷曷維其
已上以愴斯民之無祿下以惜平生之知己嗚呼哀哉
尚享

推氏卒哭祭文

至元廿四年歲次丁亥二月壬辰朔十七日戊申中議
大夫王惲謹以玄酒庶羞之奠敢昭告于亡妻推氏之

靈嗚呼禮嚴卒哭氣渝一時愾然興感悠悠我思去日
漸遠神而明之爰仰道宮有求戚知哀薦成事用光其
儀若子與孫衰衣纍纍心馬寸草恩則春暉伸哀報德
泣涕交頤而於自致其殆庶幾惟靈降鑒以慰永悲嗚
呼哀哉尚享

祭三藏佛圖澄文

惟師薄游襄國實開帝聰聞音知物變眩幽通非此無
以回猛鷲而神事功我師真筌不忘在空來拜祠下辛

歲初冬酌觴乞靈裴徊呪龍庶一勺之達水澆至人之
心肖也尚享

祭宋文貞公墓

至元十九年歲次壬午五月己未朔十一己巳謹以清
酌之奠致祭于唐太尉文貞宋公墓下嗚呼惟岳降神
生甫及申為周之楨如公之生於唐迺開元之治具也
昔玄宗能遠而不忘一旦召而相之何其明耶及惑伶
人一譖公終老于家何其昧哉豈天寶之亂於後有不

容置大器於久安故耶於戲往者何咎國家方以親賢
為急天或寵綏四方若公者復克降靈作甫與申免夫
望隴思賢之歎此呂子所以再瞻隧道動曠世相感之
意也區區之誠惟神其鑒之尚享

授少中大夫福建閩海道提刑按察使告祖宗

文

己丑秋八
月四日

至元廿六年歲次己丑八月丁未朔越四日庚戌孝孫
惲敢昭告于王氏三代祖宗祖妣之靈惲不肖獲承祖

宗遺訓以至今日又於此月初三日欽奉宣命進授少
中大夫福建閩海道提刑按察使是皆祖宗奕葉德積
之故越小子何能存歿光顯宜知所自特陳薄奠是用
昭告尚享

祭待制圖克坦衍文

維至元廿六年歲次己丑冬十月丁未朔十二日己未
少中大夫福建閩海道提刑按察使王憚致奠于故待
制圖克坦公之靈嗚呼禍與福善惡以應之變其常理有

不復致詰者惟翰林侍講學士顯軒先生厥心孔嘉樂
善修德及其立朝行道罔不傾悉晚歲得子又復良碩
學由家傳志乃早立先生云亡相與咨惜念渠零屏繼
任翰職淹留京師豈造物者將有俟而補先生之不及
一旦天奪松摧玉質云何不淑而臻此極晷若堂之三
封帳遼海之不溢何一氣之哀謝逮子身而迹熄余愈
知善惡之叵量蒼蒼之不可必也不然豈行焉忽諸致
臯陶庭堅之不食吾不可而識也噫

辭墳祝文

伏以甌越東南之極徼憲使外臺之正名受命以來夙夜
祇懼有不遑寧處者於是月十七日卯刻與子公孺輩
前赴任所伏惟明靈相其不逮以道護之尚享

祭雙忠文

至元廿六年歲次己丑冬十月丁未朔二十六日壬申
謹以清酌之奠敢昭告于唐臣中丞張公睢陽太守許
公之靈惟神忠抗全節義摧賊鋒既障江淮載清河洛

精爽在上其生炳如暉等適有事於維揚特乞回新眷
顧惟朽質遠涉畏涂過覬之心斷非敢萌不虞之變庶
祈默祐尚享

祭淮水文

惟神發源桐山橫界楚甸德叅四瀆潤涵百川惓恭奉
綸恩遠臨殊域險阻炎蒸有所自惜者惟神鑒祐其安
以濟是則神上有以欽承明命下有以盡臣子之義也

尚享

亡妻推氏祭文

遣奠祭文

維至元廿三年歲次丙戌冬十一月癸亥朔十有二日
甲戌中議大夫前行臺行御史王惲謹以牲醪之奠致
祭於夫人推氏之靈維君為婦克恭以母則武助我內
治其宜其適四十三年迺猶一日春我貧家勤亦云極
惟是盡瘁遂臻於疾彌留八年屢值已棘孰祛其災稍
復安息孟冬辛酉遽變容度孰禡其魄溘先朝露惟此
喪制我實主之布冠齊衣我具舉之木美藏嚴恐速腐

之美慰汝心汝其顧之我卜甲戌空焉襲吉奉安汝柩
皇姑之側升輜發引爰用控告汝宜勿憾我未為校魂
兮歸來此四荒不可以往兮惟汝子孫是依是保黯黯
精魂悄悄心目旬浹之間重有所祝日薄西山一語不
復念之輿傷又增悒鬱於戲零落山丘生存華屋自古
昏然非汝之獨惟弗偕老天為之酷有淚如泉永注河
曲嗚呼哀哉尚享

過趙祭忠武史公祠文

夫用物精多者英爽罔昧垂顧異常者死生不殊我丞相忠武史公以丘山之重顧草芥之微其生也卵而翼之其歿也寐而訓之茲者奉詔北上展拜新祠敢乞明靈增益不逮益愚魯之性惟其素知於言動之間庶幾默祐尚享

秋澗集卷六十四

欽定四庫全書叢要卷一萬六千二百二十一

集部

秋澗集卷六十五

元 王惲 撰

詞

中林有鳥詞

唁姨母而思親也

哀哀母氏壺儀光兮我鞠我育其勞昌兮植思靜佳風
飄颺兮顧惟蒿蔚擬諼芳兮菽水奉歡其憂忘兮母恃
子豫亦所望兮一朝致樂初未嘗兮夜夢見之晝微茫

兮歲月逾邁拱木蒼兮履此霜露中心傷兮我行宗城
如渭陽兮瞻戀姨闈自不遑兮展我孺慕聞母香兮贈
之瓊瑰幣安將兮枝同氣連何殊於幽明間兮庶幾母心
慰下泉兮中林有烏翩其反兮情極反哺鳴聲應而喧
兮可以人而不如鳥之志兮別淚盈睫下霑袂兮停雲
在空浩無際兮我思母氏曷有既兮

哀友生李子辭

并序

中統五年甲子歲夏五月廿有九日晝漏盡三十刻府

從事周貞以友生季子之喪來告聞之驚怛迺為輟食
因憶予弱冠時始識渠於教官張文紀學舍性資純雅
似不能言者叩其禮經皆能成誦於口既長從必陽趙
公業誦賦故日夕翱翔相得為甚狎逮壬子秋顯軒徒
單公自甯來居曰今而後執經問學吾知所從矣於是
樞衣席下大玩厥辭含章既貞士論乃厭每自嘆古人
讀書患其無書今人置書不觀何居乎必廣萃群書使
之滿家而已及三史甫畢而病嘻學之難成也如此可

勝嘆哉子天性孝友為人簡靜不羣喜作詩其較量體格推敲聲律有過人者然識者以骨清而癯耳小而偃恐非壽相也今年春顧見憊氣蒸出顏間僕謂曰子殆病矣不然何神與氣索然無光耶子少休學本潤身守身為大吾子其慎之既而卧病在床以迄於死初其父命其子曰而吏而商斷不汝為惟士與農迺所願學吁為父者可謂知其子而得其教為子者可謂盡其孝而養其志者矣維其天不假年聲光潛室不少白於世是

廼可惜也於戲天道無親常與善人若季氏者可謂一
門善人矣遘罹凶極一至於此天之報施善人果何如
哉予不得而知也噫武死矣非文昌以攄予之哀而見
若之志如李觀歐陽詹之不幸終復聞於世者以昌黎
之文故也君諱武字子文世為青齊人壽三十有四遂
掇毫寓哀以其辭誄曰

猗嗟季氏以善傳兮種德及嗣培福田兮父母之心一
何賢兮子奉以行周且旋兮學根於心浩浩天兮再世

而昌其流淵兮有物忌媚坎壈纏兮云何不淑遭此遭
兮自古有死豈子然兮維卒不施涕所漣兮哀哀父母
白垂顛兮狎于弗順蓋子棺兮東城之野子之原兮悲
風瀟瀟淇水寒兮游魂一去不復還兮永矣無聞閔九
泉兮反袂拭而慨其嘆兮禍淫福善此何愆兮天道悠
遠疑其無所聞兮其脩與短幸不幸之間兮嗚呼哀哉夫
我何言子所安兮

故中奉大夫浙東宣慰使趙郡陳公哀辭

至元十四年歲次丁丑秋中奉大夫浙東道宣慰使陳
公按營田東下厯明逾召九月七日歸屯新昌為賊姦
所乘遇害嗚呼哀哉公未歿前五月子夢公柩轆而過
衛再夢坐越府上望公而不得接後閱月復夢把臂談
詠如在試院中時第霧氣盪霄終不覩其面明日卜之奉
常宋君不吉曰後幾日當有惡報至予魄動而不忍聞
既而公故吏張永錫以訃來告乃審公之所以亡嗚呼
哀哉初癸丑歲公侍謀於漢邸聞走名而喜之及尹洛

師一見殆平生歡至元三年以邦伯釐衛日得游從燕處為文章往復時或持論古今傾底裏無間至於振裒礪懦視予志殊銳四載間猶一日也後五年予自裏行得調公亦移鎮河湟自是不相覲者五易歲維十有三年夏四月壬辰拙堂移考試河南得武公行躍躍不能寐遂自梁抵申由宛葉入洛而竟事於汴寢飭游居不斯須離者餘七十日公以平昔出處素所蘊而必者一發而盡於予竊壯夫志弘而毅氣剛以直學切而有用

器遠而足識皜皜乎有不可尚已者及祖帳夷門酒酣
獻欵悲不能訣去至揚解而歌曰孤忠耿耿信不疑兮
匪席匪石可卷移兮與子論交乃所期兮日暮途遠將
何之兮彼蒼悠悠其聞斯兮予上馬歸念且訝其遽如
許也嗚呼噫唏公死矣予尚忍言哉或者以玉山賊門
庭寇也終宋亡而不克揃新昌下邑也惡而無所顧盍
去諸子曰公之不去者以弭禍亂懷新附分也事不辭
難患不苟免志也去之民何賴焉賊或有知使洞貫之

誠一言開悟於以窮根窟掃餘孽宣威海道以靖東南
在公為弗難不幸擁馬直前言未及諭而兇鋒闕加蓋
公之所能者天也其不能者命也嚮使因鼠輩而喪厥
守以偷生而為得計名節委地坐眎民殘豈公之志也
哉况公生平忠誼表表審量素定晚節操履益堅其遇
當行可為得少伸抱負分一死久矣昔顏太師知賊狀
已明將命而徑往李司徒視逆刀交下握節而不去二
公之甘心劇躬者正以忠烈之氣寧以一不幸遽可慊

然於其心哉今以公事節槩之不少異矣然不使公從
朱雲王遵滙丹表於折檻之前抗忠諫於伏蒲之地柰
何徙死道路纓絕於穿窬之手此士論共惜僕尤哀而
為之辭也公諱祐字慶甫趙之寧晉人固窮力學工為
詩尚氣能道所欲言節齋其自號也嗣子夔繼請兵討
賊得害公者七人戮越州市次子臯扶其喪葬北邙之
新阡其辭曰

維天降材深有謂兮清明萃躬經此一世事兮伊逢昌

辰臣子尤不可易兮鴻毛沛風宜乎奮厥翼兮百纒幾
施有物訶以忌兮固窮善道退而甘所棄兮何縻以好
爵足將進而躓兮擠之禍賊天胡為而厲兮俾姦惡者
何所懲忠善者將何恃兮豈福善禍淫之戒時或撓而
弛兮豈命數一定善惡混而致兮豈一氣偶然乘之者
隨所值兮不然何厚其所可薄而賢者莫錫類兮嗚呼
言至於此天道悠悠此心盡而俟兮自古有死死非以
義等草木之敝兮堂堂節齋明是義兮夫我何尤公所

求兮既獲死所公乃休兮有子而孝復厥讎而歸丘兮
是或蒼蒼者有足賴神埋於焉在今魂歸來些歆予文
之一愾兮固元身不歿名永肩於崧岱兮噫

故中奉大夫山東東西道宣慰使史公哀辭

事有曠世相感歎歎不自己者豈非義激於衷默有所
契而然耶况神交罔間沒而陰相者哉故宣慰史侯五
路萬戶留後之嫡長太尉忠武公之猶子也不肖自早
歲蒙開府盼睐獲識侯于明而合并有數款狎則未也

逮提憲朔南適平宋來歸時接燕談三載之間猶一日
然既而起公宣慰東方走亦持節甌越前次甬東一夕
夢公相戒云君方從事閩徼得喪有命尚慎眠食不宜
中動臨歧握手有戀戀不已者予又嘗銘公兄墓以名
驟見貺及是倦游思歸公復見夢曰遠回在邇但吾乘
不得與同耳後數日聞公訃馬亦隨斃計公卒辰適始
夢甬上時也吁亦異哉嗚呼公於余深矣往有以教歸
有以啓迪之非神交而何哭墓草宿且惡夫涕之無從

也癸巳冬予在翰林公之子親衛指揮使煥弟秘監輝
來謁出諸君銘章仍有徵於余感念疇昔迺願言公
為人深靖有識量善謀能斷生長豪貴不以居養自高
周知物情未嘗減否出口平居褒衣素裙以琴書自娛
賓從宴游若與世浮沉者及其治兵作牧撫循籌畫二
者並用不相底滯有成算而無遺慮所謂總戎作氣帥
尹而寓軍容者公其有焉宜乎為世父鍾愛名聲昭於
人功烈著於後也至元甲申夏六月余將往厯下見公

於所居南樓置酒酌別既酣談論古今成敗傾徹底裏
且及平時寤寐風雲破碎陣敵等舉如濟南珍闕橫梁
臨江之役皆是也曰異時倘經故處當知予敵王所愾
志也吾老矣將無復再得去三年公薨謝官下於戲公
今已矣顧視一時鉅室世臣其麗不鮮較其德業間望
哀榮終始略無遺憾鮮有及公者嗚然尚何辭而哀之
惟是存歿陰相久要之言耿耿在抱義激愚衷故特發
其隱而未書者俾告公靈庶慰車過腹痛繫劍喬木之

意云其辭曰

天之降才實為艱兮用應時需又所難兮文武一轍造物者靳其全兮合而兼濟粵惟世之賢兮堂堂史公北方強兮知柔知剛萬夫望兮依乘風雲秉鉞戎軒蕩無前兮有來羣后策勛盟府相後先兮收斂豹韜作牧民編于蕃宣兮國倚以重民懷風愛動海堧兮神而化之人亡政息伊時遭兮嗚呼哀哉若公者其英其靈有無間兮豈隨化歸盡魂無不之渺逝川兮其或奮為神明

司幽玄兮明復為人續其志之淵兮若或亶然又不知其幾世幾年兮論至於此尚何言兮所以增我永慨者正復哀斯民之不幸抑且感知已而涕連也

劉孝先子迪祝辭

古者名訓冠前字加冠後改而推稱蓋以責其禮之成全成人之道孝悌忠信莫重而先四者有立吉孰大焉曰禹曰益九官讓賢及陳儆告也如是况余人然山木取義併其名而字之予以四行擴充迪傳劉氏子其服

膺拳拳猶日見鄉先生於朝端也

周氏小女祝辭

元貞元年秋過總尹孟戡家出小女拜且命誦孝經
論語等篇殊琅然也仍請訓辭為祝因書以付之蘭
即燕故家留判趙公外孫也

英英女孥何靜嘉兮翁初見之燕故家兮牙牙點粧玼
瓊珈兮學語未正鶯囀花兮今年拜予雙鬢鷓兮洞簫
有賦非所誇兮孝章魯語誦無涯兮謝以蘊稱汝其昭

兮詢以小字曰蘭嬌兮歲徂芳華憺翠翹兮猗猗揚揚
茲容馥兮女惟德馨幽閑在今佩而服之儀與誠兮女
紅蠶休尤所賴兮守以貞順敬毋怠兮付之汝誦於以
書悅

觀溟漲辭

山雲蒸兮杳而昏大壑澹兮涇流奔渚崖曲兮千里一
夕平兮光彌二水之充兮無幽無深遠朝滄溟兮臣妾
之心幽人觀其瀾逝者何嘆兮周而復還萬物化結水

之仁功成而退兮殆君子之逡巡日往而睇視兮悟夫
噓噏於此身又何必酌樽中之醪問江山之神也耶

鳴榔曲

壬申春三月予自京師南還十八日夜半過平棘西
浚水上聞漁人鳴榔中沆聲響甚厲駐車起聽令人
杳然有江灣漁樂之思作鳴榔曲以寫其音節云其
詞曰

榔鳴葦間回風遠遞洲空月寒音節愈厲響應虛谷波

翻木際驚羣魚而入簷笑古人之用智至於駐車而三聽
欲挈舟而同逝

田橫墓歌辭

至元丙子夏六月奉堂移偕節齋陳公以事東之偃
師過橫墓下慨慕耿光悲歌而去歌曰

秦以帝稱魯連之所恥兮漢以劍起布衣之所極兮橫
王東海意不充其覲兮天命攸歸吾將奚所適兮死或
當理庶烈士之則兮

秋澗集卷六十五